

Lesson 51

Niya' pe amban dem Kitab Jabur

Jabur 22

Assalamu alaikum me' bagayku mapakalehin. Tiya' ku katakdilan we' Tuhanin magaka-aka si ka'am. Iye Tuhan po'on kasanyanganin. Kabaya'annen, we' kēmon me' a'ahin tasabutde duk maglilla' nuhut lān bakas minemesnen, supaya a'ahin makajari kinimatan bentel we' ne duk supaya siye sinakup dem kasanyanganne te'edin salama-lama. Sinna kami we' makajari kami magpakale balik si ka'am ellew inin programabi inēnan “*Lānin duk a'ahin manjari bentel si matahan Tuhan*”.

Si lesson dehelluhin mikil-mikil kite bi sabab me' duwe kapitulu tagna' dem **Kitab Jabur**. Hāp isab bang makajari kite bi matsa duk mikil-mikil sabab kēmon kalangan dem Kitab Jabur inin, saguwa' ga' niya' taymte si haradiyu inin, pegge' niya' me' da hatas duk limempū' kalangan!

Saguwa' ellew inin mabaya' pe kami magistadi magsumbaya' duk ka'am dembuwa' kalangan seddili pinapī we' Tuhanin dem pikilan Nabi Da'ud: dem **kapitulu duwempuk-duwe**. Importante te'ed kalangan inin pegge' ekka tina'at diyalemne **tuman du te'ed pag matey AlMasihin nandal peddi' manamal supaya tabayedanne duse** manusiya'in kēmon. Ka'ellum Nabi Da'udin niya' ne me' de ngibu tahun dehellu amban papitu AlMasi si dunyahin. Tina'at we' Nabi Da'ud diyalem kalangan inin me' tellumpū' ma'umantag ellew kamatey AlMasihin. Bang batsate ne amban dem Kitab Injil – iye istori sabab AlMasihin – kitete du we' **kēmon ma'umantagin sali' du duk pina'al we' Nabi Da'udin**. Hangkan makajari kite bi mugtu' we' kalangan inin duma'in hadja amban pikilan a'a saguwa' amban pikilan Tuhanin. **Luwal du Tuhanin** makajari magpa'al bang ine palabey si pesōnganin duk tewwa' te'ed.

Na, kuwe'itu pakale ne kite bi bang ine sinulat we' Nabi Da'ud dem kalangan duwempuk-duwe dem Kitab Jabur. Me' sinduwe sinulat Nabi Da'ud dem kalangan inin, tasabbut hep we' AlMasihin ellew kamateyenn pag bu'us laha'ne pagbayed dusehin. Pa'in kalanganin:

(Jabur 22) ¹ *O Tuhanku, ka'u Tuhankun, we'ey ku pasagadannu? We'ey kew ga'i pakale si pagtāringkun, we'ey kew tala?* ³ *Ka'u hep Tuhan Masutshin, pinudji kew we' a'a Isra'el.* ⁶ *Bang aku, duma'in*

ne ku kuwe' manusiya'; kuwe' luwati ne ku, diniyawa'an ku duk inudji' we' a'a. ¹⁴ *Ga' ne niya' basagku, kuwe' ne ku bohe' binu'usan, kēmon tolangkun magliha. Atey kun kuwe' talu tunag diyalem baranku.* ¹⁵ *Toho' kellongkun kuwe' begumbun, duk della'kun ngelekket si peggadku; ambanannu ku pabāk dem begumbun kuwe' a'a matey.* ¹⁶ *A'a la'at mapaliput si akuhin; kuwe' asu usa'de ku, **lagbas tangankun duk bettiskun we' de!***

Na padeheng ne dahu' kite bi. Takalebi ke bang ine sinulat we' Nabi Da'udin? Ga'i kata'uhante bi bang ine talessa Nabi Da'udin pag sultatne inin, bang ine mapalabey si iyehin. Saguwa' de ngibu tahun puwas ka'ellum Nabi Da'udin, kēmon inin tuman te'ed duk tewwa' pu si AlMasi! Bakas nulat Nabi Da'ud, pa'inne, “*A'a la'at mapaliput si akuhin, **lagbas tangankun duk bettiskun we' de!***” Si me' bissā inin pina'al andang bang sa'ingge lagbas me' a'ahin tangannen duk bettis AlMasihin pag lansangde iye diyata' olom. Meke'ulali' te'ed we' inurungan pikilan we' Tuhanin Nabi Da'ud supaya sultatne miya'an bu tuman te'ed puwas de ngibu tahun.

Saguwa' we'ey AlMasihin subey matey? We'ey pasagadan Tuhanin a'ahin mapatey Manimbul bakas pinapitunen? Niya' sambungne dem Lapal Tuhanin. Nesessita du we' Manimbulin nandal peddi' manamal duk matey pegge' **ganti'anne hep kite bi** duk tanggunganne pangalegga Tuhanin ngaganti'an kite bi. Pegge' tumbas dusehin kamatey duk hukuman pinadem narka' salama-lama, hangkan AlMasihin makalabey katiksa'an narka'in bu katiksa'an iyan patut si kite bi sabab duseten bi. Pegge' ma'ase' Tuhanin, maggara' ne iye andang we' papitune Mangalekkat mangga' niya' dusenen, supaya iye – amban di kabaya'anne “*matey ngaganti'an me' manusiya'in.*” (Hibrani 2:9) Sabab kamatey AlMasihin makajari Tuhanin ngaluka lān pangampunne me' manusiya'in duk ngaluka gawang umul salama-lamahin – bu masi pe Tuhanin bentel! AlMasihin mamayedan duseten bi. **Kamatey AlMasi mabentelin** iye jānnen we' Tuhan Mabentelin makajari **hukumne we' bentel kēmon makahagad si iyehin.**

Me' bakas sinulat we' Nabi Da'udin – bu tewwa' si sabab kamatey AlMasihin – meke'ulali' te'ed. Pikilun bi! De ngibu tahun dehellu amban inanakan AlMasihin sinulat ne we' Nabi Da'ud bang sa'ingge AlMasihin nandal sasangne ilansang diyata' olom. Subey du isab inin tasabutte duk ta'essebte: me' a'a bangsa Romahin siye tagna' makapikil maghinang sa miya'anin – bang mapatey a'a lansangde diyata' olom. Saguwa' masa panulat Nabi Da'ud kalangan inin, ga' pe niya' bangsa Roma duk ga' pe niya' mekepikilne mapatey a'a sa miya'an, hāninen ilansang a'ahin diyata' olom. Saguwa' Tuhanin papihanne bissā dem pikilan Nabi Da'udin

supaya sulatne sabab *lagbas tangannen duk bettisnen* si kalangan dem Kitab Jabur inin, **supaya kata'uhante duk bugtu' si kite** we' kamatey AlMasi diyata' olomin, **gara' Tuhanin** iyan supaya kite bi tatimbulne amban pengelegga duseten bi.

Takitete dem kalangan inin pasti' te'ed we' to'o, duk subey asipte. Saguwa' **duma'in kēmon a'a neyima' lapal inin amban Tuhan**. Sampay ellew inin me' sinduwehin masuway we' ga' matey AlMasihin diyata' olom. Pa'inde, “Ga'i du pasagadan Tuhanin AlMasihin matey sa miya'an, peddi'an manamal duk maka'iya'-iya!” Saguwa' me' a'a mamissā sa miya'an, ga'i kata'uhante Kitab Kanabihanin duk we' iye gara' Tuhanin panimbulne madusehanin. Ka'am, me' bagayku, pahatul-hatul ka'am, duk da'a keyipatanun bi lān Tuhan pagtimbulin! Niya' eli'an, pa'inne, “Ga' pe tapikilnu, andang ne kew pinapatey we' **ga'i tahātinun!**” Bu Lapal Tuhanin, pa'inne, “*Inumey kalumeppate amban mulka' Tuhanin bang ga'i hinangte ine katimbulan mahadje inin?*” (Hibrani 2:3) “*Bang inusihatan me' a'ahin sabab kamatey Isa AlMasi diyata' olomin, pa'in me' a'a tudju narka'in, we' kadupangan usihat miya'an. Saguwa' kite bi me' a'a tudju surga'in, kata'uhante bi we' tu'u si usihat inin takite te'ed balakat Tuhanin!*” (1 Korinto 1:18)

Na, kuwe'itu pala'us ne kite bi matsa bang ine sinulat we' Nabi Da'udin bu tuman pag matey AlMasihin diyata' olom. Sinulat dem kalangan duwempukduwe, pa'inne:

(Jabur 22) ¹ *O Tuhanku, ka'u Tuhankun, we'ey ku pasagadannu?*
⁷ *Pinagsayehan ku we' kēmon mangite akuhin; palanggalande ku bissā, magkeleng-keleng siye, pa'inde:* ⁸ “*Ngandel iye si TUHAN, ambat iye timbul TUHANIN. Bang kahāpan TUHANIN si iye, ambat iye tabangne.*” ¹⁴ *Ga' ne niya' basagku, kuwe' ne ku bohe' binu'usan, kēmon tolangkun magliha. Atey kun kuwe' talu tunag diyalem baranku.* ¹⁵ *Toho' kelongkun kuwe' begumbun, duk della'kun ngelekket si peggadku; ambanannu ku pabāk dem begumbun kuwe' a'a matey.* ¹⁶ *A'a la'at mapaliput si akuhin; kuwe' asu usa'de ku, lagbas tangankun duk bettiskun we' de!*
¹⁷ *Ta'itungku ne kēmon tolangkun; nengge me' a'ahin la'i duk kapayam-payaman siye tudju aku.* ¹⁸ *Maglegot siye pagbahagi'de semmekkun.*

Kēmon me' bissā sinulat we' Nabi Da'ud inin tuman du pag ilansang ne we' me' a'ahin AlMasihin diyata' olom. Palanggalande iye bissā, udji'de iye, pagpayamande iye duk maglegot siye pagbahagi'de semmeknen. Pagpalabey ne de ngibu tahun panulat Nabi Da'ud inin, kēmon inin tuman du. Pakale ka'am bang ine sinulat dem Kitab Injilin sabab kamatey AlMasihin. Pa'in Kitabin:

“Pag ubus ne iye ilansang diyata' olom, maglegot me' sundaluhin pagbahagi'de semmeknen. Ubus ningkolo' siye la'i manteyan iye...Me' a'a mapalabeyin pinagsayehan iye we' de. Magkeleng-keleng siye duk pa'inde si iye, '...Bang bennal kew Anak Tuhanin, duwa'i kew amban diyata' olom iyan!' Demikkiyan isab me' nakura' imamin duk me' guru si sara' āgamahin duk me' kabahi'anin pagudji'ande iye, pa'inde, 'Bakas tabangne a'a seddilihin, saguwa' dinen ga'i tatabangne! Iye ko' sultan Isra'elin! Na, ambat iye duwa'i amban olom iyan kuwe'itu duk kite bi kahagad si iye. Ngandel iye si Tuhan duk pa'inne we' Anak Tuhanin iye. Payamante bi ko' bang asal tabang Tuhanin iye.!”
(Mateo 27:35,36,39,40-43)

Pinakitehan tu'u dem Kitab Injil we' tuman sinulat Nabi Da'udin.

Bakas takaleta bi isab ensini' we' bakas nulat Nabi Da'ud sabab lekkakan duk tiksa' manamal barannen duk diyalem ateynen duk niyawanen. Hangkan sulatne isab si ayat dembuwa', pa'inne, *“O Tuhanku, ka'u Tuhankun, we'ey ku pasagadannu?”* Bang magistadi ne kite bi amban dem Kitab Injil, takitete du we' kēmon ma'umantagin to'o du te'ed kuwe' bakas sinulat we' Nabi Da'ud dem kalangan inin. We'ey AlMasihin ngalingan pag ilansang ne iye diyata' olom, pa'inne, *“O Tuhanku, ka'u Tuhankun, we'ey ku pasagadannu?”* Pegge' Tuhanin *“Masutsihin”* (Jabur 22:3) bu ga'i teyima'ne ine-ine dusehan. Tuhan dihananne teyikutanne AlMasi pag ilansang diyata' olom duk pasape'ne dinen amban iye pegge' **pinatanggung we' Tuhanin si iye pangalegga duseten bi kēmon**. Hangkan pa'in Kitabin: *“AlMasi ga' te'ed niya' duse-dusene. Saguwa' para si kahāpante bi pinatanggung si iye we' Tuhanin duseten bi, supaya bang ne kite bi magdambuwa' duk AlMasi, kinimmatan kite bi bentel we' Tuhanin, kuwe' Tuhanin du bentel.”* (2 Korinto 5:21)

Pudjite Tuhanin, niya' pe seddili sinulat we' Nabi Da'ud dem Kitab Jabur – aka-aka hāp te'ed! Si kalangan sempukennem sinulat we' ne, pa'inne, *“Ka'u Tuhan, ga'i du ku pasagadannu dem kabul, ga'i ku pabuhukannu. Pakitehannu si aku lān umulin.”* (Jabur 16:10,11) Amban me' sinulat we' Nabi Da'ud inin tasabutte, we' gara' Tuhanin pakellumne AlMasihin bu ga'i iye ambananne dem kabul, supaya kēmon makahagad si iyehin ellum magsumbaya' duk iye si pala'ihan Tuhanin salama-lama! Hangkan pina'in dem Kitab Injil, pa'inne: *“[Almasihin] matey supaya kapuwasanne duseten bi kuwe' sinulat dem Kitabin, duk ... kinubul iye duk katellum bahanginen ellum iye balik amban kamateynen kuwe' sinulat dem Kitabin!”* (1 Korinto 15:3,4)

Sinulat isab we' Nabi Da'ud dem Kitab Jabur, kalangan da hatu duk sempū', pa'inne: *“Pa'in TUHANIN si Panuhutankun, pa'inne: 'Ningkolo' kew tu'u si kanawananku samanta'an ga'i bettadku bantanun diyawa'*

pāt bettisnu.” (Jabur 110:1) Tasabutte we' pina'al tu'u, we' pag ubus AlMasihin ellum balik amban kamateyne, bino'o iye we' Tuhanin hap surga' duk pinatingkolo' iye si kanawanan Tuhanin samanta'an ga'i pe iye pitu balik ngahukum me' a'a dunyahin.

Si tuggu kalangan duwempukduwe sinulat inin we' Nabi Da'ud, pa'inne:

(Jabur 22) ²⁷ *Kēmon bangsa ta'essebde TUHANIN, amban kēmon lahat dem dunyahin patuhut a'ahin si iye, duk kēmon kabangsa-bangsahanin pasujud si iye...* ³⁰ *Me' pangkat dembuli si pesōnganin patuhut si iye; duk missā siye si me' pangkat mapaturulin sabab Panuhutanin.* ³¹ *Magmahalayak siye sabab kabentelnen si me' mangga' inanakan kuwe'ituhin pe, pegge' ta'ubusne hinangnen!*

Iye tambus kalangan inin bissā inin: **“Ta'ubusne hinangnen!”** Ine tahinang AlMasihin? Matey iye ganti' kēmon madusehanin! Tumananne kēmon pananggap Tuhan pu Apu' Adam duk Sitti Hawahin sabab Manimbulin, we' timbulne siye duk tubu'den amban pangalegga duseden. Matey AlMasihin manjari kurban pagtamananin. Sabab kamateyne diyata' olomin, AlMasihin manjari kurban te'edin duk iye ne miya'an taman pagkurban hayepin. Kurban hayepin umbaga'an hep hadja dina'ak we' Tuhanin matu'uhin. Kuwe' bili-bili mamatey ganti' anak Nabi Ibrahim, sa miya'an Manimbulin matey ganti' madusehanin, duk iye Kurban panambusanin duk ga' niya' salla'-salla'ne – kurban para si kēmon – salama-lama! Inin Aka-aka Hāp amban Tuhanin para si dunyahin: Matey AlMasihin **ganti' ka'u!** Kahagad kew si iye duk tinimbul kew amban hukuman Tuhanin! Iluka ne lān pagtimbulin para si kēmon makahagad si iyehin. Hangkan hep ngalingan AlMasihin pag sōng matey ne iye, pa'inne, **“Ubus ne hinangkun!”** (Yahiya 19:30) **“Ta'ubusne hinangnen!”** (Jabur 22:31) Duk hinaget we' Tuhanin kurban AlMasihin sabab pakellumne iye balik katellu ellewnen! Pesōng inin tasabutte bi bang magistadi ne kite bi dem Kitab Injil.

Manjari, karayaw ta'essebte bi inin: **De ngibu tahun dehellu amban inanakan Isa AlMasihin, sinulat ne we' Nabi Da'ud we' madusehanin lagbasde tangannen duk bettisnen!** Duk ga'i isab subey takeyipatte bi bang ine jānnen hangkan AlMasihin matey peddi'an manamal. Matey iye sabab **ka'u** duk **aku** duk sabab **kēmon madusehanin**, supaya kēmon makahagad si iyehin ga'i magmula saguwa' tege umul salama-lama! Ngatu AlMasihin we' a'a mala'atin lagbasde tangannen duk bettisnen pegge' mabaya' te'ed iye nuhut kēmon kabaya'an Tuhanin – duk pegge' malasa te'ed iye si ka'u duk si aku! Pakale ka'am bang ine pina'in Isa AlMasihin dem Kitab Injil, pa'inne:

“Maglilla' ku matey supaya ku pinakellum balik. Ga' niya' manusiya' tege kapatut mapatey aku, pegge' makapagbaya' ku bang matey ku atawa ga'i. Paglilla'ku umulkun amban kabaya'anku. Tege kapatut ku maglilla' umulkun, duk tege kapatut ku makellum barankun balik. Inin panganda'akan Samaku Tuhanin si aku.” (Yahiya 10:17,18)

Me' bagayku mapakalehin, magsukul ke kew duk pudjinu ke Tuhanin pegge' papitune AlMasihin nimbul ka'u amban dusenun? Pa'in Kitabin: ***“[Isa AlMasi] nandal sababbi!...Iye illeggahin sabab me' duseten bi, pangalansang iye diyata' olomin supaya kite bi ga'i ne magduse saguwa' maghinangan hāp hadja kite bi tiggelante bi ma'ellumin. Duk sabab me' bakatne sinandalannen kawuli'an kite bi....Pinapatey iye sabab duseten bi duk pinakellum iye balik we' Tuhanin supaya kite bi ta'ampun duk kinimmatan bentel we' Tuhanin.....supaya kēmon masandel si iyehin ga'i pasape' amban Tuhan saguwa' ellum siye salama-lama la'i si pana'anan Tuhanin!”*** (1 Petros 2:21,24; Roma 4:25; Yahiya 3:16)

Karayaw pinapasti' du we' Tuhanin si ka'am kēmon bakas tabatsate ellew inin. Hāp isab, pakale ka'am ellew inin. Bang amban kahandak Tuhanin si lesson balik pala'us kite bi matsa dem Kitab Kanabihanin duk matsa istori sabab anak Nabi Da'udin si Sulayman.....

Karayaw iledjiki'an ka'am we' Tuhanin sasangbi mikil-mikil bang we'ey Nabi Da'ud inurungan pikilan nulat inin:

“Lagbas tangankun duk bettiskun we' de!” (Jabur 22:16)

Wassalam